

一切佛經及闡揚佛法諸書。無不令人趨吉避凶。改過遷善。明三世之因果。識本具之佛性。出生死之苦海。生極樂之蓮邦。讀者必須生感恩心。作難遭想。淨手潔案。主敬存誠。如面佛天。如臨師保。則無邊利益。自可親得。若肆無忌憚。任意褻瀆。及固執管見。妄生毀謗。則罪過彌天。苦報無盡矣。奉勸世人。當遠罪不益。離苦得樂也。

藥師瑠璃光如來本願功德經

全卷

藥師如來



藥師如來本願經重刻跋

佛與衆生心體是一。而心之相用則天淵懸殊。由相用懸殊故。其所受用者。亦復天淵懸殊也。佛則唯以無緣大慈。同體大悲。度脫衆生爲懷。了無人我彼此之心。縱度盡一切衆生。亦不見能度所度之相。故得福慧具足。爲世間尊。衆生則唯以自私自利爲事。雖父母兄弟之親。尙不能無彼此之相。況旁人世人乎哉。故其所感業報。或生貧窮下賤。或墮三途惡道。即令戒善禪定自修。得生人天樂處。但以無大悲心。不能直契菩提。以致福報一盡。仍復墮落。可不哀哉。是則唯欲利人者。正成就其自利。而唯欲自利者。乃適所以自害也。藥師如來本願經者。乃我釋

迦世尊。愍念此界一切罪苦衆生。爲說藥師如來因中果上。利
生之事實。爲究竟離苦得樂之無上妙法也。衆生果能發慈悲
喜捨之大菩提心。受持此經此呪。及此佛名號。推其功效。尙可
以豁破無明。圓成佛道。況其餘種種果位。種種福樂乎哉。然在
佛心固欲以無上覺道全體授與一切衆生。而衆生智有淺深。
固不得不隨其所樂。令彼所求各各如願也。須知藥師一經。及
與佛號。并其神呪。即釋迦藥師所得之阿耨多羅三藐三菩提
法。凡至誠受持者。即是以佛莊嚴而自莊嚴也。故玉琳琇國師
常持此經。及此佛號。以是禪教律淨之總持法門。故受持者。或
生淨琉璃世界。或生極樂世界。待至豁破凡情。圓成聖智。則直

契寂光。東西俱泯。而復東西歷然。隨願往生。則與彌陀藥師。同歸秘藏。是名諸佛甚深行處。聖聰大師。以心安和尚所書之本。刻板流通。欲令受持者。發起正信。祈簡明以告之。又此經係唐玄奘法師所譯。其八菩薩但舉其目。未標其名。說呪一段。又復缺略。後之知識。欲令經義完全。故依七佛本願經。添入說呪一段。共四百二十八字。依灌頂第十二經。添入八菩薩名。以三經原是一經故也。須知在昔。貝葉唯屬鈔寫。或有遺亡。以致譯文全缺互異。後人添入。深契佛心。故諸註者咸皆宗之。恐以藏本對校。致生疑慮。故略書緣起。以慶完璧云。說呪一段從說呪前復次曼殊

室利起至所求願滿乃至菩提止

民國十一年壬戌冬月

古莘常慚愧僧釋印光謹撰

此序揭露諸佛甚深行處。具雙融互助之妙。須知諸佛但欲衆生離苦得樂。反迷成悟。初無方向之分。先說西方淨土。勸人往生。是被一機。再說東方淨土。勸人往生。另被一機。故求西者生。求東者亦生。若修西方而兼念藥師佛者。則有八大菩薩示其正路。是則佛先示以融通東西而導以同歸之密。甚深行處。如順水行舟。更加順風。其進必速。彌陀前引。藥師助後。菩薩開路。當其時也。不生淨土難矣。吾人唯憂淨業之不精。用心之不專。不宜別生枝節。妄執情見。三復此序。其庶幾乎。

持明附識

藥師瑠璃光如來本願功德經

唐三藏法師玄奘奉

詔譯

如是我聞。一時薄伽梵遊化諸國。至廣嚴城住樂音樹下。與大
苾芻眾八千人俱。菩薩摩訶薩三萬六千。及國王大臣。婆羅門。
居士。天龍八部人。非人等。無量大眾。恭敬圍繞。而爲說法。爾時
曼殊室利法王子。承佛威神。從座而起。偏袒一肩。右膝著地。向
薄伽梵。曲躬合掌。白言。世尊。唯願演說如是相類諸佛名號。及
本大願殊勝功德。令諸聞者。業障消除。爲欲利樂像法轉時。諸
有情故。爾時世尊讚曼殊室利童子言。善哉善哉。曼殊室利。汝
以大悲勸請我說諸佛名號。本願功德。爲拔業障所纏有情。利

益安樂像法轉時諸有情故。汝今諦聽。極善思惟。當爲汝說。曼殊室利言。唯然。願說。我等樂聞。佛告曼殊室利。東方去此過十殑伽沙等佛土。有世界名淨瑠璃。佛號藥師瑠璃光如來。應正等覺。明行圓滿。善逝。世間解。無上士。調御丈夫。天人師。佛。薄伽梵。曼殊室利。彼世尊藥師瑠璃光如來。本行菩薩道時。發十二大願。令諸有情。所求皆得。

第一大願。願我來世得阿耨多羅三藐三菩提時。自身光明熾然。照耀無量無數無邊世界。以三十二大丈夫相。八十隨形莊嚴其身。令一切有情。如我無異。

第二大願。願我來世得菩提時。身如瑠璃。內外明徹。淨無瑕穢。

光明廣大。功德巍巍。身善安住。燄網莊嚴。過於日月。幽冥眾生。悉蒙開曉。隨意所趣。作諸事業。

第三大願。願我來世得菩提時。以無量無邊智慧方便。令諸有情。皆得無盡所受用物。莫令眾生有所乏少。

第四大願。願我來世得菩提時。若諸有情。行邪道者。悉令安住菩提道中。若行聲聞獨覺乘者。皆以大乘而安立之。

第五大願。願我來世得菩提時。若有無量無邊有情。於我法中。修行梵行。一切皆令得不缺戒。具三聚戒。設有毀犯。聞我名已。還得清淨。不墮惡趣。

第六大願。願我來世得菩提時。若諸有情。其身下劣。諸根不具。

醜陋頑愚。盲聾瘖瘂。攣臂背僂。白癩顛狂。種種病苦。聞我名已。一切皆得端正。點慧諸根完具。無諸疾苦。

第七大願。願我來世得菩提時。若諸有情。眾病逼切。無救無歸。無醫無藥。無親無家。貧窮多苦。我之名號。一經其耳。眾病悉除。身心安樂。家屬資具。悉皆豐足。乃至證得無上菩提。

第八大願。願我來世得菩提時。若有女人。爲女百惡之所逼惱。極生厭離。願捨女身。聞我名已。一切皆得轉女成男。具丈夫相。乃至證得無上菩提。

第九大願。願我來世得菩提時。令諸有情。出魔罣網。解脫一切。外道纏縛。若墮種種惡見稠林。皆當引攝。置於正見。漸令修習。

諸菩薩行。速證無上正等菩提。

第十大願。願我來世得菩提時。若諸有情。王法所錄。繩縛鞭撻。繫閉牢獄。或當刑戮。及餘無量災難陵辱。悲愁煎逼。身心受苦。若聞我名。以我福德威神力故。皆得解脫一切憂苦。

第十一大願。願我來世得菩提時。若諸有情。饑渴所惱。爲求食故。造諸惡業。得聞我名。專念受持。我當先以上妙飲食。飽足其身。後以法味。畢竟安樂而建立之。

第十二大願。願我來世得菩提時。若諸有情。貧無衣服。蚊蟲寒熱。晝夜逼惱。若聞我名。專念受持。如其所好。卽得種種上妙衣服。亦得一切寶莊嚴具。華鬘塗香。鼓樂眾伎。隨心所玩。皆令滿

足。曼殊室利。是爲彼世尊藥師瑠璃光如來。應正等覺。行菩薩道時。所發十二微妙上願。復次曼殊室利。彼世尊藥師瑠璃光如來。行菩薩道時。所發大願。及彼佛土功德莊嚴。我若一劫。若一劫餘。說不能盡。然彼佛土。一向清淨。無有女人。亦無惡趣。及苦音聲。瑠璃爲地。金繩界道。城闕宮閣。軒牕羅網。皆七寶成。亦如西方極樂世界。功德莊嚴。等無差別。於其國中。有二菩薩摩訶薩。一名日光徧照。二名月光徧照。是彼無量無數菩薩眾之上首。次補佛處。悉能持彼世尊藥師瑠璃光如來正法寶藏。是故曼殊室利。諸有信心善男子。善女人等。應當願生彼佛世界。爾時世尊。復告曼殊室利童子言。曼殊室利。有諸眾生。不識善

惡唯懷貪悋。不知布施及施果報。愚癡無智。闕於信根。多聚財寶。勤加守護。見乞者來。其心不喜。設不獲已而行施時。如割身肉。深生痛惜。復有無量慳貪有情。積集資財。於其自身。尚不受用。何況能與父母妻子。奴婢作使。及來乞者。彼諸有情。從此命終。生餓鬼界。或旁生趣。由昔人間。曾得暫聞藥師瑠璃光如來名故。今在惡趣。暫得憶念。彼如來名。卽於念時。從彼處沒。還生人中。得宿命念。畏惡趣苦。不樂欲樂。好行惠施。讚歎施者。一切所有。悉無貪惜。漸次尙能以頭目手足。血肉身分。施來求者。況餘財物。復次曼殊室利。若諸有情。雖於如來受諸學處。而破尸羅。有雖不破尸羅。而破軌則。有於尸羅軌則。雖得不壞。然毀正

見有雖不毀正見而棄多聞於佛所說契經深義不能解了。有雖多聞而增上慢由增上慢覆蔽心故自是非他嫌謗正法爲魔伴黨如是愚人自行邪見復令無量俱胝有情墮大險坑此諸有情應於地獄旁生鬼趣流轉無窮。若得聞此藥師瑠璃光如來名號便捨惡行修諸善法不墮惡趣設有不能捨諸惡行修行善法墮惡趣者以彼如來本願威力令其現前暫聞名號從彼命終還生人趣得正見精進善調意樂便能捨家趣於非家如來法中受持學處無有毀犯正見多聞解甚深義離增上慢不謗正法不爲魔伴漸次修行諸菩薩行速得圓滿復次曼殊室利若諸有情慳貪嫉妬自讚毀他當墮三惡趣中無量千

歲受諸劇苦。受劇苦已。從彼命終。來生人間。作牛馬駝驢。恆被鞭撻。飢渴逼惱。又常負重。隨路而行。或得爲人。生居下賤。作人奴婢。受他驅役。恆不自在。若昔人中。曾聞世尊。藥師。琉璃光如來名號。由此善因。今復憶念。至心歸依。以佛神力。眾苦解脫。諸根聰利。智慧多聞。恆求勝法。常遇善友。永斷魔胃。破無明殼。竭煩惱河。解脫一切生老病死憂悲苦惱。復次曼殊室利。若諸有情。好喜乖離。更相鬪訟。惱亂自他。以身語意。造作增長種種惡業。展轉常爲不饒益事。互相謀害。告召山林樹塚等神。殺諸眾生。取其血肉。祭祀藥叉。羅刹。婆等。書怨人名。作其形像。以惡呪術。而呪詛之。厭魅蠱道。呪起屍鬼。令斷彼命。及壞其身。是諸有

情若得聞此藥師瑠璃光如來名號。彼諸惡事悉不能害。一切展轉皆起慈心。利益安樂。無損惱意。及嫌恨心。各各歡悅。於自己所受。生於喜足。不相侵陵。互爲饒益。復次曼殊室利。若有四眾。苾芻。苾芻尼。鄔波索迦。鄔波斯迦。及餘淨信善男子。善女人等。有能受持八分齋戒。或經一年。或復三月。受持學處。以此善根。願生西方極樂世界。無量壽佛所。聽聞正法。而未定者。若聞世尊藥師瑠璃光如來名號。臨命終時。有八大菩薩。其名曰文殊師利菩薩。觀世音菩薩。得大勢菩薩。無盡意菩薩。寶檀華菩薩。藥王菩薩。藥上菩薩。彌勒菩薩。是八大菩薩。乘神通來。示其道。路。卽於彼界種種雜色眾寶華中。自然化生。或有因此生於天。

上雖生天上。而本善根亦未窮盡。不復更生諸餘惡趣。天上壽盡。還生人間。或爲輪王。統攝四洲。威德自在。安立無量百千有情。於十善道。或生刹帝利。婆羅門。居士。大家。多饒財寶。倉庫盈溢。形相端正。眷屬具足。聰明智慧。勇健威猛。如大力士。若是女人。得聞世尊藥師瑠璃光如來名號。至心受持。於後不復更受女身。復次曼殊室利。彼藥師瑠璃光如來得菩提時。由本願力。觀諸有情。遇眾病苦。瘦癯乾消。黃熱等病。或被魘魅。蠱毒所中。或復短命。或時橫死。欲令是等病苦消除。所求願滿。時彼世尊入三摩地。名曰除滅一切眾生苦惱。既入定已。於肉髻中。出大光明。光中演說大陀羅尼曰。

南無薄伽伐帝

鞞殺社婁嚕

薛瑠璃鉢刺婆

喝囉闍也

怛他揭多耶

阿囉訶諦

三藐三勃陀耶怛姪他唵

鞞

殺逝鞞殺逝

鞞殺社三沒揭諦

莎訶

爾時光中說此呪已。大地震動。放大光明。一切眾生病苦皆除。受安隱樂。曼殊室利。若見男子女人有病苦者。應當一心爲彼病人。常清淨澡漱。或食或藥。或無蟲水。呪一百八遍。與彼服食。所有病苦悉皆消滅。若有所求。至心念誦。皆得如是無病延年。命終之後。生彼世界。得不退轉。乃至菩提。是故曼殊室利。若有男子女人。於彼藥師瑠璃光如來。至心殷重恭敬供養者。常持此呪。勿令廢忘。

復次曼殊室利。若有淨信男子女人。得聞藥師瑠璃光如來。應正等覺。所有名號。聞已誦持。晨嚼齒木。澡漱清淨。以諸香華。燒香塗香。作眾伎樂。供養形像。於此經典。若自書。若教人書。一心受持。聽聞其義。於彼法師。應修供養。一切所有資身之具。悉皆施與。勿令乏少。如是便蒙諸佛護念。所求願滿。乃至菩提。

爾時曼殊室利童子白佛言。世尊。我當誓於像法轉時。以種種方便。令諸淨信善男子善女人等。得聞世尊藥師瑠璃光如來名號。乃至睡中。亦以佛名覺悟其耳。世尊。若於此經受持讀誦。或復爲他演說開示。若自書。若教人書。恭敬尊重。以種種華香。塗香末香。燒香。華鬘瓔珞。幡蓋伎樂。而爲供養。以五色綵。作囊

盛之灑掃淨處。敷設高座。而用安處。爾時四大天王。與其眷屬。及餘無量百千天眾。皆詣其所。供養守護。世尊。若此經寶流行之處。有能受持。以彼世尊藥師瑠璃光如來本願功德。及聞名號。當知是處。無復橫死。亦復不爲諸惡鬼神奪其精氣。設已奪者。還得如故。身心安樂。佛告曼殊室利。如是如是。如汝所說。曼殊室利。若有淨信善男子善女人等。欲供養彼世尊藥師瑠璃光如來者。應先造立彼佛形像。敷清淨座。而安處之。散種種華。燒種種香。以種種幢旛。莊嚴其處。七日七夜。受八分齋戒。食清淨食。澡浴香潔。著清淨衣。應生無垢濁心。無怒害心。於一切有情。起利益安樂慈悲喜捨平等之心。鼓樂歌讚。右繞佛像。復應

念彼如來本願功德。讀誦此經。思惟其義。演說開示。隨所樂求。一切皆遂。求長壽得長壽。求富饒得富饒。求官位得官位。求男女得男女。若復有人。忽得惡夢。見諸惡相。或怪鳥來集。或於住處。百怪出現。此人若以眾妙資具。恭敬供養。彼世尊藥師。瑠璃光如來者。惡夢惡相。諸不吉祥。皆悉隱沒。不能爲患。或有水火刀毒懸險。惡象師子。虎狼熊羆。毒蛇惡蠍。蜈蚣蚰蜒。蚊蟲等怖。若能至心憶念彼佛。恭敬供養。一切怖畏。皆得解脫。若他國侵擾盜賊反亂。憶念恭敬彼如來者。亦皆解脫。復次曼殊室利。若有淨信善男子。善女人等。乃至盡形。不事餘天。唯當一心歸佛法僧。受持禁戒。若五戒。十戒。菩薩四百戒。苾芻二百五十戒。苾

芻尼五百戒。於所受中。或有毀犯。怖墮惡趣。若能專念彼佛名號。恭敬供養者。必定不受三惡趣生。或有女人。臨當產時。受於極苦。若能至心稱名禮讚。恭敬供養彼如來者。眾苦皆除。所生之子。身分具足。形色端正。見者歡喜。利根聰明。安隱少病。無有非人奪其精氣。爾時世尊告阿難言。如我稱揚彼世尊藥師瑠璃光如來。所有功德。此是諸佛甚深行處。難可解了。汝爲信不。阿難白言。大德世尊。我於如來所說契經。不生疑惑。所以者何。一切如來。身語意業。無不清淨。世尊。此日月輪。可令墮落。妙高山王。可使傾動。諸佛所言。無有異也。世尊。有諸眾生。信根不具。聞說諸佛甚深行處。作是思惟。云何但念藥師瑠璃光如來一。

佛名號。便獲爾所功德勝利。由此不信。返生誹謗。彼於長夜。失大利樂。墮諸惡趣。流轉無窮。佛告阿難。是諸有情。若聞世尊藥師瑠璃光如來名號。至心受持。不生疑惑。墮惡趣者。無有是處。阿難。此是諸佛甚深所行。難可信解。汝今能受。當知皆是如來威力。阿難。一切聲聞。獨覺。及未登地諸菩薩等。皆悉不能如實信解。唯除一生所繫菩薩。阿難。人身難得。於三寶中。信敬尊重。亦難可得。聞世尊藥師瑠璃光如來名號。復難於是。阿難。彼藥師瑠璃光如來。無量菩薩行。無量善巧方便。無量廣大願。我若一劫。若一劫餘。而廣說者。劫可速盡。彼佛行願善巧方便。無有盡也。爾時眾中。有一菩薩摩訶薩。名曰救脫。卽從座起。偏袒右

肩右膝著地。曲躬合掌。而白佛言。大德世尊。像法轉時。有諸眾生。爲種種患之所困厄。長病羸瘦。不能飲食。喉脣乾燥。見諸方暗。死相現前。父母親屬。朋友知識。涕泣圍繞。然彼自身。臥於本處。見琰魔使。引其神識。至於琰魔法王之前。然諸有情。有俱生神。隨其所作。若罪若福。皆具書之。盡持授與琰魔法王。爾時彼王。推問其人。計算所作。隨其罪福。而處斷之。時彼病人。親屬知識。若能爲彼歸依。世尊藥師。瑠璃光如來。請諸眾僧。轉讀此經。然七層之燈。懸五色續命神幡。或有是處。彼識得還。如在夢中。明了自見。或經七日。或二十一日。或三十五日。或四十九日。彼識還時。如從夢覺。皆自憶知。善不善業。所得果報。由自證見。業

果報故。乃至命難。亦不造作諸惡之業。是故淨信善男子。善女人等。皆應受持藥師琉璃光如來名號。隨力所能。恭敬供養。爾時阿難問救脫菩薩曰。善男子。應云何恭敬供養彼世尊藥師琉璃光如來。續命旛燈復云何造。救脫菩薩言。大德。若有病人。欲脫病苦。當爲其人。七日七夜。受持八分齋戒。應以飲食及餘資具。隨力所辦。供養苾芻僧。晝夜六時。禮拜行道。供養彼世尊藥師琉璃光如來。讀誦此經四十九遍。然四十九燈。造彼如來形像七軀。一一像前各置七燈。一一燈量大如車輪。乃至四十九日。光明不絕。造五色綵旛。長四十九搩。手應放雜類眾生。至四十九。可得過度危戾之難。不爲諸橫惡鬼所持。復次阿難。若

刹帝利灌頂王等。災難起時。所謂人眾疾疫難。他國侵逼難。白
界叛逆難。星宿變怪難。日月薄蝕難。非時風雨難。過時不雨難。
彼刹帝利灌頂王等。爾時應於一切有情。起慈悲心。赦諸繫閉。
依前所說供養之法。供養彼世尊藥師瑠璃光如來。由此善根。
及彼如來本願力故。令其國界。卽得安隱。風雨順時。穀稼成熟。
一切有情。無病歡樂。於其國中。無有暴惡藥叉等神。惱有情者。
一切惡相。皆卽隱沒。而刹帝利灌頂王等。壽命色力。無病自在。
皆得增益。阿難。若帝后妃主。儲君王子。大臣輔相。中宮綵女。百
官黎庶。爲病所苦。及餘厄難。亦應造立五色神旛。然燈續明。放
諸生命。散雜色華。燒眾名香。病得除瘉。眾難解脫。爾時阿難。問

救脫菩薩言。善男子。云何已盡之命。而可增益。救脫菩薩言。大德。汝豈不聞如來說有九橫死耶。是故勸造續命幡燈。修諸福德。以修福故。盡其壽命。不經苦患。阿難問言。九橫云何。救脫菩薩言。若諸有情。得病雖輕。然無醫藥。及看病者。設復遇醫。授以非藥。實不應死。而便橫死。又信世間邪魔外道。妖孽之師。妄說禍福。便生恐動。心不自正。卜問覓禍。殺種種眾生。解奏神明。呼諸魍魎。請乞福佑。欲冀延年。終不能得。愚癡迷惑。信邪倒見。遂令橫死。入於地獄。無有出期。是名初橫。二者橫被王法之所誅戮。三者畋獵嬉戲。耽淫嗜酒。放逸無度。橫爲非人奪其精氣。四者橫爲火焚。五者橫爲水溺。六者橫爲種種惡獸所噉。七者橫

墮山崖。八者橫爲毒藥。厭禱呪詛。起屍鬼等之所中害。九者飢渴所困。不得飲食。而便橫死。是爲如來略說橫死。有此九種。其餘復有無量諸橫。難可具說。復次阿難。彼琰魔王。主領世間名籍之記。若諸有情。不孝五逆。破辱三寶。壞君臣法。毀於性戒。琰魔法王。隨罪輕重。考而罰之。是故我今勸諸有情。然燈造幡。放生修福。令度苦厄。不遭眾難。爾時眾中有十二藥叉大將。俱在會座。所謂

宮毗羅大將	伐折羅大將	迷企羅大將	安底羅大將
額你羅大將	珊底羅大將	因達羅大將	波夷羅大將
摩虎羅大將	眞達羅大將	招杜羅大將	毗羯羅大將

此十二藥叉大將一一各有七千藥叉。以爲眷屬。同時舉聲白佛言。世尊。我等今者蒙佛威力。得聞世尊藥師瑠璃光如來名號。不復更有惡趣之怖。我等相率皆同一心。乃至盡形歸佛法。僧。誓當荷負一切有情。爲作義利。饒益安樂。隨於何等村城國邑。空閒林中。若有流布此經。或復受持藥師瑠璃光如來名號。恭敬供養者。我等眷屬衛護是人。皆使解脫一切苦難。諸有願求。悉令滿足。或有疾厄求度脫者。亦應讀誦此經。以五色縷結我名字。得如願已。然後解結。爾時世尊讚諸藥叉大將言。善哉。善哉。大藥叉將。汝等念報世尊藥師瑠璃光如來恩德者。常應如是利益安樂一切有情。爾時阿難白佛言。世尊。當何名此法。

門。我等云何奉持。佛告阿難。此法門名說藥師瑠璃光如來本願功德。亦名說十二神將。饒益有情。結願神呪。亦名拔除一切業障。應如是持。時薄伽梵說是語已。諸菩薩摩訶薩及大聲聞國王大臣。婆羅門居士。天龍藥叉健達縛阿素洛揭路荼緊捺洛。莫呼落伽人非人等一切大眾。聞佛所說。皆大歡喜。信受奉行。

讚



十二大願。饒益有情。密呪加持。德難名。禮念願圓成。怨業冰清。壽永福慧宏。

南無藥師會上佛菩薩三稱

玉琳國師藥師經題語

予辭恩絕塵，不暇披覽。偶入藏閱藥師如來本願功德，不覺手額失聲，願人人入如來願海也。或問何於此經驚歎如是。告之曰：予見世人順境淪溺者不一，富貴可畏，甚於貧賤。今此如來，使人所求如願，遂從此永不退道，直至菩提。則欲於王臣長者，一切人中，作同事攝，不乘如來願航，何從濟乎。大凡修持，須量己量法，直心直行。誠能厭惡三界，堅志往生，則專依阿彌陀經，收攝六根，淨念相繼，所謂執持名號，一心不亂，決定往生。此先自利而後利人者之所爲也。若於現前富貴功名，未能忘情，男女飲食之欲，未知深厭，則於往生法門，

未易深信。卽信矣。身修淨土。而心變娑婆。果何益乎。則求其
不離欲鉤。而成佛智。處於順境。不致淪胥者。固無如修持藥
師願海者之殊勝難思也。若能信行。久久不懈。知不獨富貴
功名。轉女成男。離危迪吉。如如意珠。隨願成就。卽得於一切
成就處。直至菩提。永無退轉。何幸如之。人間亦有揚州鶴。但
泛如來功德船。

弘一大師答佛學書局書

(乙亥年)

前承惠書，謂今年藥師如來聖誕，擬別刊行專號，屬撰文以爲提倡。近多忙碌，未暇撰文。謹述拙見如下，以備參考焉。余自信佛法以來，專宗彌陀淨土法門，但亦嘗講藥師如來本願功德經。講此經時，所最注意者三事：一、若犯戒者，聞藥師名已，還得清淨。二、若求生西方極樂而未定者，得聞藥師名號，臨命終時，有八大菩薩示其道路，即生極樂衆寶華中。三、現生種種厄難，悉得消除。故亦勸諸緇素，應誦藥師功德經，並執持藥師名號。而於求生東方淨瑠璃世界之文，未及詳釋，謂爲別被一機也。今者佛學書局諸賢，欲弘揚藥師聖典，提倡求生東方，勝願大心，甚可欽佩。但依拙見，唯可普勸衆生誦經、持名。至於求生何處，宜任其自然，即昔日求生極樂或求生兜率者，亦可發心誦藥師經並持名號；而於本願無違。因經中謂求生極樂者，命終有八大菩薩示路；又東晉譯本云：若欲得生兜率天上見彌勒者，亦當禮敬藥師瑠璃光佛。如是則範圍甚廣，可以羣機並育矣。略陳拙見，敬乞有以教之。幸甚！

原載上海「佛學半月刊」第九十期藥師如來專號

藥師佛靈感錄

(一) 瞽目重明二則



張元，字孝始，元魏河北人也。性謙謹，有孝行。微涉經史，又精釋典。年六歲，其祖以其夏中熱，欲將元就井浴。元固不肯從。祖謂其貪嬉，乃曰：「汝何爲不肯浴？」元對曰：「衣以蓋形，爲覆其褻，元不能褻露其體於白日之下。祖異而捨之。」南鄰有二杏樹，杏熟多落元園中。諸小兒競取而食之。元所得者，送還其主。及年十六，其祖喪明三年。元恆憂泣，晝夜讀佛經，禮拜以祈福祐。後讀藥師經，見盲者得視之言，遂請七僧，燃七燈，七日七夜轉藥師經行道。每言：「天人師乎，元爲孫不孝，使祖喪

明。今以燈光普施法界。願祖目見明。元求代闇。如此經七日。其夜夢見一老翁。以金鑊療其祖目。於夢中喜躍。遂卽驚覺。乃徧告家人。三日祖目果明。事見北史孝行傳。

汾陽梁氏女。兩目俱盲。遇沙門勸念藥師佛名。越二年。雙目開明。事見藥師經疏鈔卷上之三第六大願後。

(二)念佛愈疾

宋錢唐孫氏女。常念藥師咒。并禮念佛名。因病請清照律師。師爲講藥師行願因緣。大喜。至夜夢藥師佛持藥一盞。服之流汗。身心頓覺清安。事見藥師經疏鈔卷上之三第六大願後。

(三)轉女成男延嗣續

太平府官圩楊氏。止生一遺腹女。姑媳共嫗居。惟念藥師佛號。及觀音號。其女四月後。變成男子。才德兼優。經營四方。以盡孝養。同上書卷中之二。

(四)免覆舟厄

宋王通。京兆人。世積善。常持藥師經。及勸人誦。政和三年。通爲商在途。初見一青服者。與十六人至長沙江同渡。次見道服老者。呼曰。王通來。可上我船。通卽過其船。須臾風起。見先渡者。船小俱覆。通急呼佛菩薩名。老者船大。過數山坳。邀上山。謂曰。此江八百里。君合死於此。因施經勸人。內有三七數。

該橫死者。蒙公德獲免。君延壽三紀。余奉上帝命。特來護送耳。頃青衣者。土地神也。言訖不見。

(五)免大火難

元魏楊體幾。延和三年。爲饒州刺史。每晨持藥師經一卷。佛名八百。民居皆草屋。其年秋。值大風起。火發。延及署所。楊一心念佛。風回火轉。次日。親往撫問。忽見一家獨存。問其故。曰。蒙藥師金剛二經力耳。

(六)臨刑免難

魏天平中。定州孫敬德。裝觀音藥師香像。朝暮禮事。後爲賊所攀。將斷死刑。夢一沙門。令誦藥師觀音名號。有司執縛向

市且行且誦。臨刑刃三斬三折。皮肉不損。因之放還。見像項上有三刀痕。上三事均見藥師經疏鈔擇要卷中之三。
上六項靈感事迹。採自上海佛學書局藥師經旁解附錄。

普爲讀誦受持輾轉流通及出資者迴向偈曰

願以此功德

迴向諸衆生

消業增福慧

圓成勝善根

國境永平靜

風雨常調順

一切諸災難

悉皆盡除滅

出資及誦持

輾轉流通者

現眷慶安樂

先亡獲超升

善願皆成就

頓悟無生忍

永離輪迴苦

同證無上覺

印經功德芳名 (恕不尊稱)

(美元)

釋法亮

二百元

釋妙境

五十元

釋妙因

三十元

釋誠明

釋體靜

共二百五十元

釋宏乘

一百元

法布施

二千元

梁李果音

梁廷凱

共二百五十元

梁果聰

謝炎杞

共二百五十元

江淨玄

朱梁淨心

馬趙淨法

馬善任

陳淨樂

鄧淨智

鄧惠清

樊善坤

各一百元

許祖麟

謝玉音

黃潘玉霞

陳雲馨

柯仁淑

廉成書

李善靈

各五十元

黃來端

李定娟 各二十元

(港幣)

東林念佛堂

衆姓弟子

共三千元

釋培德

一千元

袁慈珍

一千元

陳淨印

一千元

翁英峰

翁孫金蘭

共一千元

羅從文

五百元

除收支外不敷

之數概由顯密

圓通寺補足

願以此功德
普及於一切
我等與衆生
皆共成佛道

藥師琉璃光如來本願功德經

(冊一全)

代 贈 處

藥師琉璃光如來本願功德經

一萬二千冊

藥師經四種譯本一千冊

地藏三經合訂本（精裝）一千冊

美國顯密圓通寺

SHEAN MIH YUAN TUNG TEMPLE

501-3RD AVENUE

SAN FRANCISCO, CALIF. 94118 U.S.A.

PHONE: (415) 386-4198

各佛教寺廟團體